

四庫全書

集部

欽定四庫全書

石倉歷代詩選卷三十

明 曹學佺 編

初唐十七

王翰

字子羽
晉陽人

贈唐祖二子

鴻飛遵枉渚鹿鳴思故羣物情尚勞愛況乃予別君別
時花始發別後蘭再薰瑤觴滋白露寶瑟凝涼氛
衰徊

北林月悵望南山雲雲月渺千里音徽不可聞

飛燕篇

孝成皇帝本嬌奢行幸平陽公主家可憐女兒三五許
羊茸惜是一園花歌舞向來時不貴一旦逢君感君意
君心見賞不見忘姊妹雙飛入紫房紫房綵女不得見
專榮固寵昭陽殿紅妝寶鏡珊瑚臺青瑣銀簧雲母扇
日夕風傳歌舞聲祇擾長信憂人情長信憂人氣欲絕
君王歌吹終不歇朝弄瓊簫下綵雲夜踏金梯上明月

明月薄蝕陽精昏嬌妬傾城惑至尊已見白虹橫紫極
復聞飛燕啄皇孫皇孫不死燕啄折女弟一朝如火絕
明明天子咸戒之赫赫宗周褒姒滅古來賢聖歎狐裘
一國荒淫萬國羞安得上方斷馬劍斬取朱門公子頭

飲馬長城窟行

長安少年無遠圖一生惟羨執金吾麒麟殿前拜天子
走馬西擊長城胡胡沙獵獵吹人面漢虜相逢不相見
遥聞鞞鼓動地來傳道單于夜猶戰此時顧恩寧顧身

為君一行摧萬人壯士揮戈迴白日單于濺血污朱輪
迴來飲馬長城窟長城道傍多白骨問之耆老何代人
云是秦皇築城卒黃昏塞北無人煙鬼哭啾啾聲沸天
無罪見誅功不賞孤魂流落此城邊當昔秦王按劍起
諸侯膝行不敢視富國強兵二十年築怨興徭九千里
秦王築城何太愚天實亡秦非北胡一朝禍起蕭牆內
渭水咸陽不復都

春女行

紫臺宮跨連綠波紅軒鈴匝垂纖羅中有一人金作面
隔幌玲瓏遙可見忽聞黃鳥鳴且悲鏡邊含笑着春衣
羅袖嬋娟似無力行拾落花比容色落花一度無再春
人生作樂須及辰君不見楚王臺上紅顏子今日皆成
狐兔塵

古蛾眉怨

君不見宜春苑中九華殿飛閣連連直如髮白日全含
朱鳥窗流雲半入蒼龍闕宮中綵女夜無事學鳳吹簫

弄清越珠簾北卷待涼風繡戶南開向明月忽聞天子
憶蛾眉寶鳳銜花揲兩螭傳聲走馬開金屋夾路鳴環
上玉墀長樂彤庭宴華寢三千美人曳花錦燈前含笑
更羅衣帳裏承恩薦瑤枕不意君心半路迴求仙別作
望仙臺琳琅禁闥遙相憶紫翠巖房晝不開欲向人間
種桃實先從海底覓蓬萊蓬萊可求不可上孤舟縹緲
知何往黃金作盤銅作莖青天白露掌中擎王母嫣然
感君意雲車羽旆欲相迎飛廉觀前空怨慕少君何事

須相誤一朝埋沒茂陵田賤妾蛾眉不重顧宮車晚出
向南山仙衛逶迤去不還朝晡泣對麒麟樹樹下蒼苔
日漸斑人生百年夜將半對酒長歌莫長歎

子夜春歌

春氣滿林香春遊不可忘落花吹欲盡垂柳折還長
女淮南曲金鞍塞北裝行行小垂手日暮渭川陽

涼州詞二首

蒲萄美酒夜光杯欲飲琵琶馬上催醉卧沙場君莫笑

古來征戰幾人回

秦中花鳥已應閑
塞外風沙猶自寒
夜聽胡笳折楊柳
教人意氣憶長安

春日思歸

楊柳青青杏花發
花年光誤客轉思家
不知湖上菱歌女
幾箇春舟在若耶

許景先

義興人

折柳篇

春色東來度渭橋，青門垂柳百千條。
長楊西連建章路，漢家林苑紛無數。
紫花始遍合歡枝，遊思半冒相思樹。
春樓初日照南隅，柔條垂綠掃金鋪。
寶釵新梳倭墮髻，錦帶交垂連理襦。
自憐柳塞淹戎幕，銀燭長啼愁夢著。
芳樹朝催玉管新，春風夜染羅衣薄。
城頭楊柳已如絲，今年花落去年時。
折芳遠寄相思曲，為惜容華難再持。

陽春怨

紅樹曉鶯啼，春風煖翠閨。
雕籠薰繡被，珠履踏金隄。
芍

藥花如吐苜蒲葉正齊
橐砧當此日行役向遼西

徐晶

同蔡孚五亭詠

章奏中京罷雲泉別業歸
拂琴鋪野席牽柳挂朝衣
翡翠巢書幌鴛鴦立釣磯
幽栖可憐處春事滿林扉

蔡起居山亭

文史歸休日棲閒卧草亭
薔薇一架紫石竹數重青
垂露和仙藥燒香誦道經
莫將山水弄持與世人聽

胡皓

和宋之問寒食題臨江驛

聞道山陰會仍為火忌辰途中甘棄日江上苦傷春
流水翻催淚寒灰更伴人丹心終不改白髮為誰新

出峽

巴東三峽盡曠望九江開楚塞雲中出荆門水上來
魚龍潛嘯雨鳧雁動成雷南國秋風晚客思幾悠哉

李元紘

京兆人

綠墀怨

征馬噪金珂
嫖姚向北河
綠苔行跡少
紅粉淚痕多
寶屋粘花絮
銀箏覆網羅
別君如昨日
青海雁頻過

相思怨

望月思氛氳
朱衾嬾更薰
春生翡翠帳
花點石榴裙
燕語時驚妾
鶯啼轉憶君
交河一萬里
仍隔數重雲

韋述

京兆人

晚渡伊水

悠悠涉伊水伊水清見石是時春向深兩岸草如積迢
遞望洲嶼逶迤亘津陌新樹落踈紅遙原上深碧回瞻
洛陽苑遽有長山隔煙霧猶辨家風塵已為客登陟多
異趣往來見行役雲起早已昏鳥飛日將夕光陰逝不
借超然慕疇昔遠遊亦何為歸來存竹帛

春日山莊

初歲開韶月田家喜載陽晚晴搖水態遲景蕩山光浦
淨漁舟遠花飛樵路香自然成野趣都使俗情忘

廣陵送別宋員外佐越鄭舍人還京

朱紱臨秦望，皇華赴洛橋。
文章南渡越，書奏北歸朝。
樹入江雲盡，城銜海月遥。
秋風將客思，川上晚蕭蕭。

韋濟

奉和聖製次瓊嶽應制

陸海披晴雪，千旗獵早陽。
岳臨秦路險，河遠漢垣長。
行漏通鳩鵲，離宮接建章。
都門信宿近，歌舞從周王。

賀知章

字季真，越州永興人。

曉發

江臯聞曙鐘輕棧理還柳海潮夜約約川露晨溶溶始
見沙上鳥猶埋雲外峰故鄉杳無際明發懷朋從

奉和御製春臺望

青陽布王道玄覽陶真性欣若天下春高逾域中聖神
臯類觀賞帝里如懸鏡繚繞八川浮峇堯雙闕映曉色
徧昭陽晴雲卷建章華滋的皪丹青樹顛氣氤氳金玉
堂尚有靈蛇下廊時還徵瑞寶入陳倉自昔秦奢漢窮

武後庭萬餘宮百數旗回五丈殿千門連綿南墜出西
垣廣畫螭蛾誇窈窕羅生玳瑁象崑崙廼卷天晴興隱
恤古來土木良非一荆臨章觀趙叢臺何如堯階將禹
室層欄窳窳下龍輿清管逶迤半綺䟽一聽南風引鸞
舞長謠北極仰鷄居

望人家桃李花

山源夜雨度仙家朝發東園桃李花桃花紅兮李花白
照灼城隅復南陌南陌青樓十二重春風桃李為誰容

棄置千金輕不顧，踟躕五馬謝相逢。徒言南國容華晚，
遂歎西家飄落遠的皜。長奉明光殿氛氲，半入披香苑
苑中珍木元自竒，黃金作葉白銀枝。千年萬歲不凋落，
還將桃李更相宜。桃李從來露井傍，成蹊結影矜艷陽。
莫道春花不可樹，會持仙實薦君王。

送人之軍

常經絕脉塞，復見斷腸流。送子成今別，令人起昔愁。隴
雲晴半雨，邊草夏先秋。萬里長城寄，無貽漢國憂。

題袁氏別業

主人不相識，偶坐為林泉。
莫謾愁沽酒，囊中自有錢。

詠柳

碧玉妝成一樹高，萬條垂下綠絲絛。
不知細葉誰裁出，二月春風似剪刀。

采蓮曲

稽山罷霧鬱嵯峨，鏡水無風也自波。
莫言春度芳菲盡，別有中流采芰荷。

回鄉偶書二首

少小離鄉老大回鄉音無改鬢毛衰
兒童相見不相識笑問客從何處來

離別家鄉歲月多近來人事半銷磨
惟有門前鏡湖水春風不改舊時波

蘇晉

藍田人河內郡公廌子

過賈六

主人病且閒客來情彌適
一酌復一笑不知日將夕
昨

來屬歡遊於今盡成昔努力持所趣空名定何益

徐安貞

龍丘人

書殿賜宴應制

校文常近日賜宴忽昇天酒正傳杯至饗人捧案前玉
階鳴溜水清閣引歸煙共惜芸香暮春風幾萬年

從駕溫泉宮

神女調溫液年年侍聖人試開臨水殿來洗屬車塵煖
氣隨明主恩波浹近臣靈威自無極從此獻千春

送王判官

明月開三峽
花源出五谿
城池青壁裏
煙火綠林西
不畏王程促
惟愁仙路迷
巴東下歸棹
莫待夜猿啼

題襄陽圖

畫得襄陽郡
依然見昔遊
峴山思駐馬
漢水憶迴舟
丹壑常含霧
青林不換秋
圖書空咫尺
千里意悠悠

程將軍夫人挽詩

琴瑟調雙鳳
和鳴不獨飛
正歌春可樂
行泣露先晞
環

珮聲猶在房櫳夢不歸將軍休沐日誰勸着新衣

聞鄰家理箏

北斗橫天夜欲闌愁人倚月思無端忽聞畫閣秦箏逸
知是鄰家趙女彈曲成虛憶青蛾斂調急遥憐玉指寒
銀鎖重關聽未關不如眠去夢中看

奉和聖製早度蒲津關

仙掌臨秦甸虹橋闢晉關兩都分地險一曲渡河灣路
得津門要時稱古戍開城花春正發岸柳曙堪攀後乘

猶臨水前旌欲換山長安迴望日宸御六龍還

奉和聖製答二相出雀鼠谷

兩臣初入夢二月扈巡邊
澗北寒猶在山南春半傳
頌聲先奉御辰象復回天
雲日明千里旌旗照一川
柳陰低輦路草色變新田
還望汾陽近宸遊自盲然

席豫

字建侯襄陽人

奉和敕賜公主鏡

令節頒龍鏡仙輝下鳳臺
含靈萬象入寫照百花開色

與皇明散光隨聖澤來妍媸冰鑑裏從此媿非才

江行紀事二首

飄飄任舟楫迴合傍江津後浦情猶在前山賞更新樹
深煙冪冪灘淺石磷磷川路南行遠淹畱惜此宸

江汎春風勢山樓曙月輝猿攀紫巖飲鳥拂清潭飛古
樹崩沙岸新苔覆石機津途賞無限征客暫忘歸

齊澣

字洗心
定州人

長門怨

焚焚孤思逼寂寂長門夜妾妬亦知非君恩那不惜
搗琴就玉階調悲聲未諧將心托明月流影入君懷

袁暉

長門怨

早知君愛歇本自無縈妬誰使恩情深今來反相誤
愁眠羅帳曉泣坐金閨暮獨有夢中魂猶言意如故

銅雀妓

君愛本相饒從來似舞腰那堪攀玉座腸斷望陵朝怨

著情無主哀凝曲不調况臨松日暮悲吹坐蕭蕭

正月閨情

正月金閨裏微風繡戶間曉魂憐別夢春思逼啼顏
遶砌梅堪折當軒樹未攀歲華方若此何日度陽關

二月閨情

二月韶光好春風香氣多園中花巧笑林裏鳥能歌
有恨離琴瑟無情著綺羅更聽春燕語妾亦不如他

七月閨情

七月坐涼宵金波滿麗譙容華芳意改枕席怨情饒錦
字沾愁淚羅裙緩細腰不如銀漢女歲歲鵲成橋

石倉歷代詩選卷三十

欽定四庫全書

石倉歷代詩選卷三十一

明 曹學佺 編

初唐十八

孫逖

潞州人

和登會稽山

稽山碧湖上勢入東溟盡煙景晝清明九峰爭隱嶙望
中厭朱紱俗內探玄牝野老聽鳴騶山童擁行軫仙花

寒未落古蔓柔堪引竹磻入山多松崖向天近雲從海
天去日就江村隕能賦丘嘗聞和歌參不敏冥搜信冲
漠多士期標準願奉濯纓心長謠反招隱

葛山潭

圓潭寫流月清明涵萬象仙翁何時還綠水空蕩漾涼
哉草木腓白露沾人衣猶醉空山裏時聞笙鶴飛

丹陽行

丹陽古郡洞庭陰落日扁舟此路尋傳是東南舊都處

金陵中斷碧江深在昔風塵起京都亂如燬雙闕戎虜
間千門戰場裏傳聞一馬化為龍南渡衣冠亦願從石
頭橫帝里京口拒戎鋒青楓林下迴天蹕杜若洲前轉
國容都門不見河陽樹輦道惟聞建業鐘中原悠悠幾
千里欲掃攬搶未云已英雄傾奪何紛然一盛一衰如
逝川可憐宮觀重江裏金鏡相傳三百年自從龍見聖
人出六合車書混為一昔年王氣今何在併向長安就
堯日荆榛古木閉荒阡共道繁華不復全赤縣惟餘江

樹月黃圖半入海人煙暮來山水登臨遍覽古愁吟淚
如霰惟有空城多白雲春風淡蕩無人見

山陰縣西樓

都邑西樓芳樹間逶迤霽色遶江山山月夜從公署出
江雲晚對訟庭還誰知春色朝朝好二月飛花滿江草
一見湖邊楊柳風遙憶青青洛陽道

夜宿浙江

扁舟夜入江潭泊露白風高氣蕭索富春渚上潮未還

天老岑邊月初落煙水茫茫多苦辛更聞江上越人吟
洛陽城闕何時見西北浮雲朝暝深

春日畱別

春路逶迤花柳前孤舟晚泊就人煙東山白雲不可見
西陵江月夜娟娟春江夜盡潮聲度征帆遙從此中去
越國山川看漸無可憐愁思江南樹

正月十五日夜應制

洛城三五夜天子萬年春綵仗移雙闕瓊筵會九賓舞

成蒼頡字燈作法王輪不覺東方日遙垂御藻新

和常州崔使君寒食夜

聞道清明近春庭向夕闌行遊晝不厭風物夜宜看斗
柄更初轉梅香暗裏殘無勞秉華燭清月在南端

奉和崔司馬遊雲門寺

繫馬清谿樹禪門春氣濃香臺花下出講坐竹間逢覺
路山童引經行谷鳥從更言窮寂滅迴策上南峰

酬萬八賀九雲門下歸谿中作

晚從靈境出林壑曙雲飛稍覺清豁盡迴瞻畫刹微獨
園餘興在孤棹宿心違更憶登攀處天香滿袖歸

送越州裴參軍充使入京

日落川徑寒離心苦未安客愁西向盡鄉夢北歸難霜
果林中變秋花水上殘明朝渡江後雲物向南看

宴越府陳法曹西亭

公府西巖下紅亭間白雲雪梅初度臘煙竹稍迎曛水
木涵澄景簾櫳引霽氛江南歸思遍春雁不堪聞

尋龍湫

仙穴尋遺跡輕舟愛水鄉
谿流一曲盡山路九峰長
漁父歌金洞江妃舞翠房
還憐葛仙宅真氣共微茫

宿雲門寺閣

香閣東山下煙花象外幽
懸燈千嶂夕卷幔五湖畫
壁餘鴻雁紗窗宿斗牛
更疑天路近夢與白雲遊

楊子江樓

楊子何年邑雄圖作楚關
江連二妃渚雲近八公山
驛

道清風外人煙綠嶼間晚來潮正滿數處落帆還

淮陰夜宿二首

水國南無畔扁舟北未期鄉情淮上失歸夢郢中疑木
落知寒近山長見日遲客心行緒亂不及洛陽時

永夕卧煙塘蕭條天一方秋風淮水落寒夜楚歌長宿
莽非中土鱸魚豈我鄉孤舟行已倦南越尚茫茫

下京口埭夜行

孤帆度綠氛寒浦落紅曛江樹朝來出吳歌夜漸聞南

漠接潮水北斗近鄉雲行役從茲去歸情入雁羣

夜到潤州

夜到丹陽郡天高氣象秋海隅雲漢轉江畔火星流
郭傳金柝閣閫閉綠洲客行凡幾夜新月再如鉤

和常州崔使君詠後庭梅二首

聞唱梅花落江南春意深更傳千里外來入越人吟
弱幹紅妝倚繁香翠羽尋庭中自公日歌舞向芳陰

梅院重門掩遙遙歌吹邊庭深人不見春至曲能傳花

落彈棋處香來薦枕前使君停五馬行樂此中偏

和上巳連寒食有懷京洛

天津御柳碧遙遙軒騎相從半夜朝行樂光輝寒食借
太平歌舞晚春饒紅妝樓下東郊道青草洲邊南渡橋
坐見司空掃西第看君侍從落花朝

和左司張員外自洛使入京中路先赴長安逢
立春日贈韋侍御等諸公

忽覩雲間數雁迴更逢山上一花開河邊淑氣迎芳草

林下輕風待落梅，秋憲府中高唱入春卿。
署裏和歌來共言，東閣招賢地自有。西征作賦才。

詠樓前海石榴

苦竹園南椒塢邊，微香冉冉淚涓涓。
已悲節物同寒雁，忍委芳心與暮蟬。
細路獨來當此夕，清尊相伴省他年。
紫雲新苑移花處，不取霜裁近御筵。

奉和李右相書壁畫山水

廟堂多暇日，山水契中情。
欲寫高深趣，還因藻繪成。

江臨戶牖三峽繞檐楹花柳窮年發煙雲逐意生能令
萬里近不覺四時行氣染荀香馥光含樂鏡清詠歌齊
出處圖畫表冲盈自保千年遇何論八載榮

送新羅法師還國

異域今無外高僧代所稀苦心歸寂滅冥坐得精微持
鉢何年至傳燈是日歸上卿揮別藻中禁下禪衣海濶
杯還渡雲遙錫更飛此行迷處所何以慰虔祈

立秋日題安昌寺北山亭

樓觀倚長霄登攀及霽朝高如石門頂勝擬赤城標天
路雲虹近人寰氣象遙山圍伯禹廟江落伍胥潮徂暑
迎秋薄涼風是日飄果林餘苦李萍水覆甘蕉覽古嗟
夷漫陵空愛沈寥更聞金刹下鐘梵晚蕭蕭

江行有懷

秋水明川路輕舟轉石圻霜多山橘熟寒至浦禽稀飛
席乘風勢迴流蕩日暉晝行疑海若夕夢識江妃野霽
看吳盡天長望洛非不知何歲月一似暮湖歸

長洲苑

吳黃武中
此地校獵

吳王初鼎峙羽獵騁雄才輦道闔門出軍容茂苑來山
從列嶂轉江自遶林迴劍騎綠汀入旌門隔嶼開合離
紛若電馳逐溢成雷勝地虞人守歸舟漢女陪可憐夷
漫處猶在洞庭隈山靜吟猿父城空應雉媒戎行委喬
木馬跡盡黃埃攬涕問遺老繁華安在哉

和詠解署有櫻桃

上林天禁裏芳樹有紅櫻江國今來見君門春意生香

從花綬轉色繞佩珠明海鳥銜初實吳姬掃落英切將
稀取貴差與衆同榮為此堪攀折芳蹊處處成

同洛陽李少府觀永樂公主入蕃

邊地鶯花少年來未覺新美人天上落龍塞始應春

劉希戩

夏日彈琴

碧山本岑寂素琴何清幽彈為風入松崖谷颯已秋庭
鶴舞白雲泉魚躍洪流予欲娛世人明月難暗投感歎

未終曲淚下不可收嗚呼鍾子期零落歸荒丘死而若
有知魂兮從我遊

唐怡

詠破扇

輪如明月盡羅似薄雲穿無由重掩笑分在秋風前

述懷

萬事皆零落平生不可思惟餘酒中趣不減少年時

徐安期

催妝

傳聞燭下調紅粉
明鏡臺前別作春
不須面上渾妝卻
畱著雙眉待畫人

顏舒

鳳棲怨

佳人名莫愁
珠箔上花鉤
清鏡鴛鴦匣
新妝翡翠樓
擣衣明月夜
吹管白雲秋
惟恨金吾子
年年向隴頭

梁獻

王昭君

圖畫失天真容華坐誤人君恩不可再妾命在和親淚
點關山月衣銷邊塞塵一聞陽鳥至思絕漢宮春

武氏

如意曲

看朱成碧思紛紛憔悴支離為憶君不信比來長下淚
開箱驗取石榴裙

徐賢妃

名惠蒲
田人

秋風函谷應詔

秋風起函谷，勁氣動河山。
偃松千嶺上，雜雨二陵間。
低雲愁廣隰，落日慘重關。
此時飄紫氣，應驗真人還。

賦得北方有佳人

由來稱獨立，本自號傾城。
柳葉眉間發，桃花臉上生。
腕搖金釧響，步轉玉環鳴。
纖腰宜寶袿，紅衫艷織成。
懸知一顧重，別覺舞腰輕。

上官昭儀

名婉兒

奉和聖製立春日侍宴內殿出剪綵花應制

密葉因裁吐新花
逐剪舒攀條雖不謬
摘藥詎知虛春
至由來發秋還未肯
踈借問桃將李相亂
欲何如

九月九日上幸慈恩寺登浮圖羣臣上菊花壽

酒

帝里重陽節香園萬乘來
卻邪萸入佩獻壽菊傳杯
塔類承天湧門疑待佛
開睿詞懸日月長得仰
昭回

綵書怨

葉下洞庭初思君萬里餘
露濃香被冷月落錦屏虛
欲奏江南曲貪封薊北書
書中無別意惟悵久離居

遊長寧公主流杯池

霽曉氣清和披襟賞薜蘿
玳瑁凝春色琉璃漾水波
跂石聊長嘯攀松下短歌
除非物外者誰就此經過

暫爾遊山第淹留惜未歸
霞窗明月滿澗戶白雲飛
書引藤為架人將薜作衣
此真攀翫所臨睨賞光輝

七歲女子

送兄

別路雲初起，離亭葉正稀。
所嗟人異雁，不作一行飛。

楊容華

楊炯
姪女


新妝詩

林鳥驚眠罷，房櫳曙色開。
鳳釵金作縷，鸞鏡玉為臺。
妝似臨池出人疑，向月來自憐。
方未已，欲去復徘徊。

士人妻

離別難

此別難重陳花飛復戀人來時梅覆雪去日柳含春物
侯催行客歸途淑氣新剡川今已遠魂夢暗相親



石倉歷代詩選卷三十一

欽定四庫全書

集部

石倉歷代詩選卷三十二

四二五

詳校官庶吉士臣范逢恩

侍讀臣孫球覆勘

總校官進士臣朱鈐

校對官編修臣盛惇崇

謄錄監生臣史鳴岡

欽定四庫全書

石倉歷代詩選卷三十二

明 曹學佺 編

盛唐

玄宗皇帝

諱隆基 睿宗第三子

送李邕之任滑臺

漢家重東郡宛彼白馬津
黎庶既蕃殖臨之勞近臣
遠別初首路今行方及春
課成應第一良牧爾當仁

登蒲州道遙樓

長榆息烽火高柳靜風塵
卜征巡九洛展預出三秦
昔是潛龍地今為上理辰
時平乘道泰聊賞遇年春
黃河分地絡飛觀接天津
一覽遺芳翰千載肅如神

初入秦川路逢寒食

洛陽芳樹映天津
灞岸垂楊宰地新
直為經過行樂處
不知虛度兩京春
去年餘閨今春早
曙色和風著花草
可憐寒食與清明
光輝併在長安道
自從關路入秦川

爭道何人不戲鞭公子途中妨蹴踔佳人馬上廢鞦韆
渭水長橋今欲渡葱葱漸見新豐樹遠看驪岫入雲霄
預想湯池起煙霧煙霧氛氲水殿開暫拂香輪歸去來
今歲清明行已晚明年寒食更相陪

春臺望

暇景屬三春高臺聊四望目極千里際山川一何壯太
華見重巖終南分疊嶂郊原紛綺錯參差多異狀佳氣
滿通溝遲步入綺樓初鶯一一鳴紅樹歸雁雙雙去綠

洲太液池中下黃鶴昆明水上映牽牛聞道漢家金盛
日別館離宮趣非一甘泉逶迤亘明光五柞連延接未
央周廬徼道縱橫轉飛閣迴軒左右長須念作勞居者
逸勿言我後焉能恤為想雄豪壯栢梁何如儉陋卑茅
室陽烏黯黯向山沈夕鳥喧喧入上林薄暮賞餘回步
輦還念中人罷百金

過大哥宅

魯衛情先重親賢愛轉多
冤旒豐暇日乘景暫經過
戚

里申高宴平臺奏雅歌復尋為善樂方驗保山河

同玉真公主過大哥山池

地有招賢處人傳樂善名
鷺池臨九達龍岫對層城
桂月先秋冷蘋風向晚清
鳳樓遙可見彷彿玉簫聲

經魯祭孔子而歎之

夫子何為者栖栖一代中
地猶鄒氏邑宅即魯王宮歎
鳳嗟身否傷麟怨道窮
今看兩楹奠當與夢時同

惟此溫泉是稱愈疾豈余獨受其福思與兆人

共之乘暇巡遊乃言其志

桂殿與山連
蘭湯湧自然
陰崖含秀色
溫谷吐潺湲
績為蠲邪著
功因養正
宣願言將億
兆同此共昌延

過老子廟

仙居懷聖德
靈廟肅神心
草合人蹤斷
塵濃鳥跡深
流沙丹竈沒
闢路紫煙沈
獨傷千載後
空餘松柏林

途次陝州

境出三秦外
途分二陝中
山川入虞虢
風俗限西東
樹

古棠陰在耕餘讓畔空鳴笳從此去行見洛陽宮

野次喜雪

拂曙闌行宮寒臯野望通繁雲低遠岫飛雪舞長空賦
象恒依物縈迴屢逐風為知勤恤意先此示年豐

送賀知章歸四明

并序

天寶三年太子賓客賀知章鑒止足之分抗歸老
之疏解組辭榮志期入道朕以其年在遲暮用循
挂冠之事俾遂赤松之遊正月五日將歸會稽遂

餞東路乃命六卿庶尹大夫供帳青門寵行邁也
豈惟崇德尚齒亦勵俗勸人無令二疏獨光漢冊
乃賦詩贈行

遺榮期入道辭老竟抽簪豈不惜賢達其如高尚心
中得秘要方外散幽襟獨有青門餞羣僚悵別深

同劉晃喜雨

節變寒初盡時和氣已春繁雲先合寸膏雨自依旬
颯飛平野霏霏靜暗塵懸知花葉意朝夕望中新

千秋節賜羣臣鏡

鑄得千秋鏡光生百鍊金
分將賜羣后過象見清心
臺上冰華澈窻中月影臨
更銜長綬帶留意感人深

送趙法師還蜀因名山莫簡

道家莫靈簡自昔仰神仙
真子今將命蒼生福可傳
江山尋故國城郭信依然
二室遙相望雲迴洞裏天

賜道士鄧紫陽

太乙三門訣元君六甲符
下傳金版術上刻玉清書
有

美探真士囊中得秘書自知三醮後翊我滅殘胡

幸蜀西至劔門

劔閣橫雲峻鑿輿出狩迴翠屏千仞合丹嶂五丁開灌
木縈旗轉仙雲拂馬來乘時方在德嗟爾勒銘才

春日出苑遊矚

太子
時作

三陽麗景早芳辰四序佳園物候新梅花百樹障去路
垂柳千條暗回津鳥飛直為驚風葉魚沒都由怯岼人
惟願聖主南山壽何愁不賞萬年春

同二相已下羣官樂遊園宴

撰日巖廊暇需雲宴樂初萬方朝玉帛千品會簪裾地
入南山近城分北斗餘池塘垂柳密原隰野花踈帝幕
看逾暗歌鐘聽自虛興闌歸騎轉還奏弼違書

王屋山送道士司馬承禎還天台

紫府求賢士清谿祖逸人江湖與城闕異跡且殊倫間
有幽棲者居然厭俗塵林泉先得性芝桂欲調神地道
踰稽嶺天台接海濱音徽從此間萬古一芳春

早度蒲關

鐘鼓嚴更曙山河野望通
鳴鑾下蒲坂飛旆入秦中
地險關逾壯天平鎮尚雄
春來津樹合月落戍樓空
馬色分朝景雞聲逐曉風
所希常道泰非復候繻同

途經華嶽

飭駕去京邑鳴鑾指洛川
循途經太華迴蹕暫周旋
翠嶂留斜影懸巖冒夕燿
四方皆石壁五位配金天
彷彿者高掌依稀聽子先
終當銘歲月從此配靈仙

喜雪

日觀卜先征時巡順物情風行未備禮雲密遽飄霏委
樹寒花發縈空落絮輕朝如玉已會庭似月猶明既覩
膚先合還欣尺有盈登封何以報因此謝成功

南出雀鼠谷答張說

雷出應乾象風行順國人川途猶在晉車馬漸歸秦昔
陝關山險橫汾鼓吹頻草依陽谷變花待北巖春聞有
鷓鴣客清詞雅調新求音思欲報心跡竟難陳

為趙法師別造精院過院賦詩

宗師心物外為道運虛舟不戀巖泉賞來從宮禁遊探
玄知幾歲習靜更宜秋煙樹辨朝色風湍聞夜流坐朝
繁聽覽尋勝在清幽欲廣無為化因茲庶可求

端午

端午臨中夏時清日復長鹽梅已佐鼎麴蘖且傳觴事
古人留迹年深縷績長當軒知槿茂向水覺蘆香億兆
同歸壽羣公共保昌忠貞如不替詒厥後昆芳

春中興慶宮酺宴

九達長安道三陽別館春
還將聽朝暇迴作豫遊晨
不戰要荒服無刑禮樂新
合酺覃土宇歡宴接羣臣
玉笋飛千日瓊筵薦八珍
舞衣雲曳影歌扇月開輪
伐鼓魚龍雜撞鐘角觝陳
曲終酣興晚須有醉歸人

千秋節宴

并序

令節肇開情兼愛敬率題八韻以示羣臣

蘭殿千秋節稱名萬壽觴
風傳率土慶日表繼天祥
玉

宇開花萼宮，縣動會昌衣。冠白鷺，下帝幕。翠雲長獻遺，
成新俗。朝儀入舊章，月銜花。綬鏡露，綴綵絲。囊處處，祠
田。祖年年。宴杖鄉，深思一德事。小獲萬人康。

早登太行山中言志

清蹕度河陽，凝笳上太行。火龍明鳥道，鐵騎繞羊腸。白
霧埋陰壑，丹霞助曉光。澗泉含宿凍，山木帶餘霜。野老
茅為屋，樵人薜作裳。宣風問耆艾，敦俗勸農桑。涼德慙
先哲，徽猷慕昔皇。不因今展義，何以冒垂堂。

平胡 并序

戎羯不虔竊我荒服命偏師之俘翦彼應期而咸
殄一麾克定告捷相仍爰作是詩聊以言志

雜虜忽猖狂無何敢亂常羽書朝繼入烽火夜相望將
出凶門勇兵因死地強蒙輪皆突騎按劍盡鷹揚鼓角
雄山野龍蛇入戰場流膏潤沙漠濺血染鋒鉞霧掃清
玄塞雲開靜朔方武功今已立文德愧前王

遊興慶宮作 并序

暇日與兄弟同遊興慶宮登勤政務本及華萼相
輝之樓所以觀風俗而勸人崇友于而敦睦詩以
言志歌以永言情發于衷率題此什

代邱青門右離宮紫陌陸庭如過沛日水若渡江時綺
觀連雞岫朱樓接雁池從來敦棣萼今此茂荆枝萬葉
傳餘慶千年志不移凭軒聊屬目輕輦共追隨務本方
崇訓相輝保羽儀時康俗易漸德薄政難施鼓吹迎飛
蓋絃歌送羽卮所希覃率土孝弟一同規

送張說巡邊

端拱復垂裳長懷御遠方
股肱申教義戈劔靖要荒
命將綏邊服雄圖出廟堂
三台入武帳八座起文昌
寶胄匡韓主華宗輔漢王
茂先慙博物平子謝文章
盡節恢時佐輸誠禦寇場
三軍臨朔野駟馬即戎行
鼓吹威夷狄旌軒溢洛陽
雲臺先著美今日更貽芳

過大哥山池題石壁

澄潭皎鏡石崔巍萬壑千巖暗
綠苔林亭自有幽貞趣

况復秋深爽氣來

題梅妃畫真

億昔嬌妃在紫宸
鉛華不御得天真
霜綃雖似當時態
爭奈嬌波不顧人

石倉歷代詩選卷三十二

欽定四庫全書

石倉歷代詩選卷三十三

明 曹學佺 編

盛唐二

王灣

洛陽人

晚夏馬嵬卿叔池亭即事寄京都一二知己

黍職畿甸淹濫陪時俊後才輕策疲劣勢薄常驅走牽
役勞風塵秉心在巖藪宗賢開別業彤勝代稀偶竹繞

清渭涓泉流白渠口逡巡期賞會揮忽變星斗逮此乘
務閒因而訪幽叟入來殊景物行復洗紛垢林靜秋色
多潭深月光厚盛香蓮近折新味瓜初剖滯拙懷隱淪
書之寄良久

奉使登終南山

常愛南山遊因而盡原隰數朝至林嶺百仞登嵬岌石
壯馬徑窮苔色綠步入物奇春狀改氣遠天香集虛洞
策杖鳴低雲拂衣濕倚巖見廬舍入戶欣拜揖問性矜

勤勞示心教澄習玉英時共飯芝草為余拾境絕人不
行潭深鳥空立一乘從此授九轉兼是給辭處若輕飛
憩來唯吐吸開襟超已勝迴路倏而及煙色松上深水
流山下急漸平逢車騎向晚睨城邑峯在野趣繁塵飄
宦情溢辛苦久為吏榮進何妄執日暮懷此山悠然賦
斯什

麗正殿賜宴同勒天前煙年四韻應製

金殿忝陪賢瓊羞忽降天鼎羅仙掖裏觴拜瑣闈前院

逼青霄路厨知紫禁煙酒酣空忭舞何以答昌年

奉和賀監林月清酌

華月當秋滿朝英假興同淨林新霽入規院小涼通碎
影行筵裏搖花落酒中清宵凝爽意併此助文雄

江南意

南國多新意東行伺早天潮平兩岫失風正一帆懸海
日生殘夜江春入舊年從來觀氣象惟向此中偏

觀搗箏

虛室有秦箏，箏新月復清絃。多弄委曲柱，促語分明曉。
怨凝繁手春嬌，入曼聲近來惟此樂。傳得美人情。

晚春詣蘇州敬贈武員外

蘇臺憶季常，飛棹歷江鄉。持此功曹掾，初離華省郎。
貴門生禮樂，明代秉文章。嘉郡位先進，鴻儒名重揚。
爰從姻婭貶，豈失忠信防。萬里行驥足，十年睽鳳翔。
迴遷翊元聖，入拜佇惟良。別業對南浦，羣書滿北堂。
意深投轄盛，才重接筵光。陋學叨鉛簡，弱齡詞翰場。
神馳勞舊國。

顏展別殊方際曉雜氛散殘春衆物芳煙和踈樹滿雨
續小谿長旅拙感成慰通賢顧不忘從來琴曲罷開匣
為君張

哭補闕亡友綦母學士

明代資多士儒林得異才書從金殿出人向玉墀來詞
學張平子風儀褚彥回崇儀希上德近侍接元台曩契
心期早今遊宴賞陪屢遷君擢桂分尉我從梅忽遇乘
輶客云傾構厦材泣為洹水化歎作泰山頽冀善初將

慰尋言半始猜位聯情易感交密痛難裁遠日寒旌暗
長風古挽哀囊中無舊業行處有新苔反哭魂猶寄終
喪子尚孩奠田門吏給墳水路人栽遽洩悲成往俄傳
寵令迴玄經貽石室朱紱耀泉臺地古春長閉天明夜
不開登山一臨哭揮淚滿蒿萊

閏月七日織女

耿耿曙河微神仙此夜稀今年七月閏應得兩迴歸

張均

燕國公
說長子

和尹忭登南樓

客來已兩春更瞻韶光早
花鳥玩環合江山復駢抱
樓形寫北潭堞勢凌青島
白雲謝歸雁馳懷洛陽道

岳陽晚景

晚景寒鷗集秋風旅雁歸
水光浮日去霞彩映江飛
洲白蘆花吐園紅柿葉稀
長沙卑濕地九月未成衣

江上逢春

離憂耿未和春慮忽蹉跎
擇木猿知去尋泥燕獨過
驚

花翻霽日垂柳拂煙波
激意屢怡賞無如鄉念何

九日巴丘登高

客心驚暮序賓雁下滄洲
共賞重陽節言尋戲馬遊
湖風扶戍柳江雨暗山樓
且酌東籬酒聊祛南國憂

和尹悉秋夜遊澠湖二首

遠水沈西日寒沙聚夜鷗
平湖乘月滿飛棹接星流
黃葉鳴淒吹蒼葭掃暗洲
願移滄浦賞歸待潁川遊

灣潭幽意深杳靄涌寒岑
石痕秋水落嵐氣夕陽沈
澄

澈天為底淵玄月作心青谿非大隱歸弄白雲潯

巴丘春日作

日出洞庭水春山挂斷霞江濤相映發卉木共紛華湘
戍南浮澗荆關北望賒湖陰窺魍魎丘勢辨巴蛇島戶
巢為館漁人艇作家自憐心問影三歲客長沙

岳州觀競渡

畫作飛鳧艇雙雙競拂流袿裝川色變急棹水華浮土
尚三閭俗江傳二女遊齊歌迎孟姥獨舞送陽侯鼓發

南湖澁標爭西驛樓並馳常詫速非畏日光道

岳州西城

水國何遼曠風波遂極天西江三汜合南浦二湖連危
堞臨清境煩憂暫豁然九圍觀掌內萬象閱眸前去
長沙渚山橫雲夢田汀葭變秋色津樹入寒煙潛穴探
靈詭浮山揖聖仙至人今不見迹滅事空傳

流合浦嶺外作

瘴江西去火為山炎徼南窮鬼作關從此更投人境外

生涯應在有無間

張洵

燕國公
說次子

奉和岳州山城

郡館臨清賞，開扃坐白雲。
訟虛棠戶曙，觀靜竹簷曛。
懸榻迎賓下，趨庭學禮聞。
風傳琴上意，遙向日華紛。

尹恣

張燕公出守岳州
恣為從事官補闕

秋夜陪張丞相趙侍御遊澠湖二首

并序

燕公以益司馬初到趙侍御客馬聿理方舟嬉遊

澗壑覽山川之異探泉石之竒騁望崇朝留樽待
月一時之樂豈不盛歟賦詩者列之于左

熊軾巴陵地鷁舟湘水潯江山與勢遠泉石自幽深杳
靄入天壑冥茫見道心超然無俗事清宴有空林

江上饒竒山嶺羅雲水間風秋樹色雜苔古石文斑巴
俗將千澁澗湖凡幾灣嬉遊竟不盡乘月泛舟還

泛洞庭

風光浙浙草中飄日彩熒熒水上搖
幸奏瀟湘雲壑意

山傍容與動仙槎

陰行先

開元中為
湘州從事

和張燕公湘中九日登高

重陽初啓節無射正飛灰寂寞風蟬至連翩霜雁來山
棠紅葉下岸菊紫花開今日桓公座多愧孟嘉才

王泠然

開元初為
史部典選

題河邊枯柳

隋家天子憶揚州厭坐深宮傍海遊穿地鑿山開御路

鳴笳疊鼓汎春流
流從鞏北分河口
直到淮南種官柳
功成力盡人旋亡
運謝年移樹空有
當時綵女侍君王
帳殿旌門對柳行
青葉交垂連幔色
白花飛散染衣香
今日摧殘何用道
數里曾無一株好
驛騎江帆損更多
山精野魅藏應老
涼秋九月露為霜
日夜孤舟入帝鄉
河畔時時聞落葉
客中無箇不沾裳

夜光篇

遊人夜到汝陽間
夜色冥濛不解顏
誰家暗起寒山燒

因此明中得見山山頭山下須臾滿歷險緣深無暫斷
焦聲散著羣樹鳴炎氣傍林一川暖是時西北多海風
吹上連天光更雄濁煙熏月黑高豔蕪雲紅初謂煉丹
仙竈裏還疑鑄劍神谿中劃為飛電來照物乍作流星
併上空西山無草光已滅東頂熒熒猶未絕沸湯空谷
數道水融蓋陰崖幾年雪兩京貧病若為居四壁皆成
鑿照餘未得貴遊同秉燭惟將半影借披書

試古木卧平沙

古木卧平沙摧殘歲月賒有根橫水石無葉拂煙霞春
至苔為藻冬來雪作花不逢星漢使誰辨是靈槎

淮南寄舍弟

昔予從不調經歲旅淮源念爾長相失何時返故園寄
書迷處所分袂隔涼溫遠道俱為客他鄉共在原歸情
春伴雁愁泣夜隨猿愧見高堂上朝朝獨倚門

李昂

開元中為
考功員外

賦戚夫人楚舞歌

定陶城中是妾家妾年二八顏如花閨中歌舞未終曲
天下死人如亂麻漢王此地因征戰未出簾櫳人已薦
風花菡萏落棘門雲雨徘徊入行殿日夕悠悠非舊鄉
飄飄處處逐君王閨門向裏通歸夢銀燭迎來在戰場
相從顧恩不顧已何異浮萍寄深水逐戰曾迷隻輪下
隨君幾陷重圍裏此時平楚復平齊咸陽宮闕到關西
珠簾夕殿聞鐘磬白日秋天憶鼓鞀君王縱恣翻成誤
呂后由來有深妬不奈君王容鬢衰相存相顧能幾時

黃泉白骨不可報
雀釵翠羽從此辭
君楚歌兮妾楚舞
脉脉相看兩心苦
曲未終兮袂更揚
君流涕兮妾斷腸
已見儲君歸
惠帝徒留愛子付周昌

從軍行

漢家未得燕支山
征戍年年沙朔間
塞下長驅汗血馬
雲中恒閉玉門關
陰山瀚海千萬里
此日桑河凍流水
稽洛山邊胡騎來
漁陽戍裏烽煙起
長途羽檄何相望
天子按劍思北方
羽林練士拭金甲
將軍校戰出玉堂

幽陵異域風煙改亭障連連古今在夜聞鴻雁南渡河
曉望旌旗北臨海塞沙飛浙瀝遙裔連窮磧玄漠雲平
初合陣西山月出聞鳴鏑城南百戰多苦辛路傍死卧
黃沙人戎衣不脫隨霜雪汗馬趨趨長被鐵楊葉樓中
不寄書蓮花劍上空流血匈奴未滅不言家驅逐行行
邊徼賒歸心海外見明月別思天邊夢落花落花迴望
何悠悠芳樹無人度隴頭春雲不變陽關雪桑葉先知
胡地秋田疇不賣盧龍策寶憲思勒燕然石麾兵靜北

垂此日交河湄欲令塞上無干戚會待單于繫頸時

崔珪

開元中為太子詹事

孤寢怨

征戍動經年含情拂玳筵花飛織錦處月落擣衣邊燈
暗愁孤坐牀空怨獨眠自君遼海去玉匣閉春絃

萬齊融

越州人

三日綠潭篇

春潭滉漾接隋宮宮闕連延潭水東蘋苔嫩色含波綠

桃李新花照底紅，垂菱布藻如妝鏡。麗日晴天相照映，
素影沈沈對蝶飛。金沙礫礫窺魚泳，佳人被袂賞韶年。
傾國傾城併可憐，拾翠總來芳樹下。踏青爭遶綠潭邊，
公主王孫恣遊翫。沙陽水曲情無厭，禽浮似挹羽觴杯。
鱗躍疑投水，心劔金鞭玉勒騁。輕肥落絮紅塵擁，路飛
綠水殘霞催。席散畫樓初月待人歸。

仗劍行

昨夜星宮動紫微，今年天子用武威。登車一呼風雷動，

遙震陰山撼巍巍胡驕子當見旄頭蝕應死願騎單馬
仗天威按取長繩縛虜歸仗劍遙叱路傍子匈奴頭血
濺君衣

贈別江

東南飛鳥處言是故鄉天江上風花晚君行定幾千計
程頻破月數別屢開年明年潯陽水相思寄米蓮

送陳七還廣陵

風流誰代子雖有舊無雙歡酒言相送愁弦意不降落

花馥河道垂楊拂水窓海潮與春夢朝夕廣陵江

賀朝 會稽人

南山

湖北雨初晴湖南山盡見巖巖石帆影如得海風使仙
穴茅山峰彩雲時一見邀君共探此異錄殘幾卷

孤興

晴日暖珠箔天桃色正新紅粉青鏡中娟娟可憐嘖君
子在遐險蕙心誰見珍羅幕空掩畫玉顏晴移春江瑟

語幽獨再三情未申黃鵠千里翅芳音遲所因

從軍行

朔胡乘月寇邊城軍書挿羽刺中京天子金壇拜飛將
單于玉塞振佳兵騎射先鳴推任俠龍韜決勝佇時英
聞有河湟客惜惜理帷帟常山啓霸圖汜水先天策銜
珠浴鐵向桑乾纓旗膏劍指烏丸鳴雞已報闕山曉來
雁遙傳沙塞寒直為甘心從苦節隴頭流水鳴嗚咽邊
樹蕭蕭不覺春天山漠漠長飛雪魚麗陣接塞雲平雁

翼營通海月明始看晉幕飛鷺入旋聞齊壘啼烏聲自
從一戍燕支山春光幾度晉陽關金河未轉青絲騎玉
筋應啼紅粉顏鴻歸燕相續池邊芳草綠已見氛清細
柳營莫更春歌落梅曲烽沈竈減靜邊亭海晏山空肅
已寧行望鳳京旋凱捷重來麟閣畫丹青

宿香山閣

暝望春山閣梯雲宿半空軒窓閉潮海枕席拂煙虹朱
網防棲鴿紗燈護夕蟲一聞雞唱曉已見日瞳瞳

贈酒店胡妃

胡妃春酒店絃管夜鏘鏘紅氍鋪新月貂裘坐薄霜玉盤初膾鯉金鼎正烹羊上客無勞散聽歌樂世娘

張若虛

開元初人與賀知章張旭號吳中四士

春江花月夜

春江潮水連海平海上明月共潮生滌滌隨波千萬里何處春江無月明江流宛轉遶芳甸月照花林皆似霰空裏流霜不覺飛汀上白沙看不見江天一色無纖塵

皎皎空中孤月輪江畔何人初見月江月何年初照人
人生代代無窮已江月年年祇相似不知江月待何人
但見長江送流水白雲一片去悠悠青楓浦上不勝愁
誰家今夜扁舟子何處相思明月樓可憐樓上月徘徊
應照離人妝鏡臺玉戶簾中卷不去擣衣砧上拂還來
此時相望不相聞願逐月華流照君鴻雁長飛光不度
魚龍潛躍水成文昨夜間潭夢落花可憐春半不還家
江水流春去欲盡江潭落月復西斜斜月沈沈藏海霧

碣石瀟湘無限路不知乘月幾人歸
落月搖情滿江樹

代答閨夢還

關塞年華早樓臺別望違
試衫著煖氣開鏡覓春暉
燕入窺羅幙蜂來上畫衣
情催桃李豔心寄管絃飛
妝洗朝相待風花暝不歸
夢魂何處入寂寂掩重扉

包融

延陵人

阮公嘯臺

荒臺森荆杞蒙籠無上路
傳是古人跡阮公長嘯處
至

今來清風時時動林樹逝者昔已遠升攀想遺趣靜然
荒榛間久之若有悟靈光未歇滅千載知仰慕

登翅頭山題儼公石壁

晨登翅頭山山暝黃霧起却瞻迷向背直下失城市曠
日銜東郊朝光生邑里掃除諸煙氛照出衆樓雉青為
洞庭山白是太湖水蒼茫遠郊樹倏忽不相似萬象以
區別森然共盈几坐令開心胸漸覺落塵滓北巖千餘
仞結廬誰家子願陪中峰遊朝暮白雲裏

送國子張主簿

湖岍纜初解鶯啼別離處遙見舟中人時時一迴顧坐
悲芳歲晚花落青軒樹春夢隨我心搖揚逐君去

酬忠公林亭

江外有真隱寂居歲已侵結廬近西術種樹久成陰人
迹乍及戶車聲遙隔林自言解塵事咫尺能韜沈為道
豈廬霍會靜由吾心方秋院木落仰望日蕭森持我興
來趣采菊行相尋塵念到門盡遠情對君深一談入理

窟再索破幽襟安得山中信致書移尚禽

和陳校書省中翫雪

芸閣朝來雪飄飄正滿空
寒開明月下校理落花中
色向懷鉛白光因翰簡
融能令草玄者迴思入流風

賦得岼花臨水發

笑笑傍谿花叢叢
逐岼斜朝開川上日夜發
浦中霞照灼如臨鏡
芊芊勝浣紗春來武陵道
幾樹落仙家

劉昫虛

江東人

江南曲

美人何蕩漭湖上風日長玉手欲有贈徘徊雙明璫歌
聲隨綠水怨色起青陽日暮還家望雲波橫洞房

九日送人

海上正搖落客中還別離同舟去未已遠送新知流
水意何極滿尊徒爾為從來菊花節早已醉東籬

暮秋楊子江寄孟浩然

木葉紛紛下東南日燿霜林山相晚暮天海空青蒼暝

色况復久秋聲亦何長孤舟兼微月獨夜仍越鄉寒笛
對京口故人在襄陽詠思勞今夕江漢遥相望

潯陽陶氏別業

陶家習先隱種柳長江邊朝夕潯陽郭白衣來幾年霽
雲明孤嶺秋水澄寒天物象自清曠野情何繇聯蕭蕭
丘中賞明宰非徒然願守黍稷稅歸耕東山田

登廬山峯頂寺

孤峯臨萬象秋氣何高晴天際南郡出林端西江明山

門二緇叟振錫聞幽聲心照有無界業懸前後生雖知
真機靜尚與愛網并方首金門路未遑參道情

尋東谿還湖中作

出山更回首日暮清谿深東嶺新別處數猿叫空林昔
遊有初迹此路還獨尋幽興方在往歸懷復為今雲峰
勞前意湖水成遠心望望已超越坐鳴舟中琴

送韓平兼寄郭微

上客夜相過小童能酌酒即為臨水處正值歸雁後前

路望鄉山近家見門柳到時春未暮風景自應有余憶
東州人經年別來以殷勤為傳語日夕念攜手兼問前
寄書書中復達否

寄閻防

防時在終南
豐德寺讀書

青冥南山口君與緇錫鄰深路入古寺亂花隨暮春紛
紛對寂寞徃徃落衣巾松色空照水經聲時有人晚心
復南望山遠情獨親應以修徃業亦惟立此身深林度
空夜煙月資清真莫歎文明日彌年徒隱淪

海上詩送薛文學歸海東

何處歸且遠送君東悠悠滄溟千萬里日夜一孤舟曠
望絕國所微茫天際愁有時近仙境不定若夢遊或見
青色古孤山百里秋前心方杳眇後路勞夷猶離別惜
吾道風波敬皇休春浮花氣遠思逐海水流日暮驪歌
後永懷空滄洲

越中問海客

風雨滄洲暮一帆今始歸自云發南海萬里速如飛初

謂落何處永將無所依
冥茫漸西見山色越中微
誰念去時遠人經此路稀
泊舟悲且泣使我亦霑衣
浮海馬用說憶鄉難
以違縱為魯連子山路有柴扉

送東林廡上人還廬山

石谿流已亂苔徑入漸微
日暮東林下山僧還獨歸
常為爐峰意况與遠公違
道性深寂寞世情多是非
會尋名山去豈復無清機

闕題

道由白雲盡春與青谿長時有落花至遠隨流水香聞
門向山路深柳讀書堂幽映每白日清輝照衣裳

寄江滔求孟六遺文

南望襄陽路思君情轉親偏知漢水廣應與孟家鄰在
日貪為善昨來聞更貧相如有遺草一為問家人

積雪為小山

飛雪伴春還春庭曉自閒虛心應任道遇賞遊成山峰
小形全秀巖虛勢莫攀以幽能皎潔謂近可循環孤影

臨水鏡寒光對玉顏不隨遲日盡留顧歲華間

蔡希寂

曲河人

同家兄題渭南王公別業

好閒知在家退跡何必深不出人境外蕭條江海心
軒車自來往空谷對清陰川渚將釣玉鄉亭期散金
素暉射流瀨翠色繇森林曾為詩書癖寧惟耕稼任
吾兄許微尚枉道來相尋朝慶老萊服夕閑安道
琴文章遙頌美寤寐增所欽既鬱蒼生望明時豈陸沈

登福先寺上方然公禪室

名都標佛刹萬構臨河干舉目上方峻森森青翠攢步
登諸劫盡忽造浮雲端當暑敞扃闥却嫌絺綌寒禪房
最高頂靜者殊閒安疎雨向空城數峰簾外盤午鐘振
衣坐招我同一餐真味雜飴露衆香惟蒞蘭晚來恣偃
俛茶果仍留歡

陝中作

西別秦關近東行陝服長川原餘讓畔歌吹憶遺棠河

水流城下山雲起路傍更憐棲泊處池館遶林篁

洛陽客逢祖詠留宴

縣縣鐘漏洛陽城客舍貧居絕送迎逢君貰酒因成醉
醉後焉知世上情

贈張敬微

大河東北望桃林雜樹冥冥結翠陰不知君作神仙尉
特訝行來雲霧深

張子容

先天二年
進士

春江花月夜二首

林花發岼口氣色動江新此夜江中月流光花上春分
明石潭裏宜照浣紗人

交甫憐瑤珮仙妃難重期沈沈綠江晚惆悵碧雲姿初
逢花上月言是弄珠時

雲陽驛陪闕使君邵道士夜宴

一尉東南遠誰知此夜歡諸侯傾卓蓋仙客整黃冠染
翰燈花滿飛觴雲氣寒欣承國士遇更借美人看

除夜樂城逢孟浩然

遠客襄陽郡來過海岼家樽開柏葉酒燈發九枝花妙
曲逢盧女高才得孟嘉東山行樂意非是競繁華

送蘇倩遊天台

靈異尋滄海笙歌訪翠微水鷗迎共狎雲鶴待將飛琪
樹嘗仙果瓊樓試羽衣遙知神女問獨怪阮郎歸

泛永嘉江日暮迴舟

無雲天欲暮輕鷗大江清歸路煙中遠迴舟月上行傍

潭窺竹暗出嶼見沙明更值微風起乘流絲管聲

永嘉即事寄贛縣索少府瓊

山繞樓臺出谿通里閑斜曾為謝客郡多有逐臣家海
氣朝成雨江天晚作霞題書報賈誼此濕似長沙

樂城歲日贈孟浩然

土地窮甌越風光肇祝釐挿桃銷瘴癘移竹近堦墀半
是吳風俗仍為楚歲時更逢習鑿齒言在漢川湄

永嘉作

拙宦從江左投荒更海邊山將孤嶼近水共惡谿連地
濕梅多雨潭蒸竹起煙未應悲晚髮炎瘴苦華年

送孟浩然歸襄陽

東越相逢地西亭送別津風濤看解纜雲海去愁人鄉
在桃林岼山連楓樹春因懷故園意歸與孟家隣

貶樂城尉日作

竄謫邊窮海川原近惡谿有時聞虎嘯無夜不猿啼地
暖花長發巖高日易低故鄉可憶處遙指斗牛西

自樂城赴永嘉枉路泛白湖寄松陽李少府
西行礙淺石北轉入谿橋樹色煙輕重湖光風動搖百
花亂飛雪萬嶺疊青霄猿挂臨潭篠鷗迎出浦橈惟應
賞心客茲路不言遙

九日陪潤州邵使君登北固山

五馬向西椒重陽坐麗譙徐州帶綠水楚國在青霄張
幕連江樹開筵接海潮凌雲詞客語迴雪舞人嬌梅福
慙仙吏羊公賞下僚新豐酒舊美況是菊花朝

璧池望秋月

涼夜窺清沼池空水月秋
滿輪沈玉鏡半魄落銀鈎
蟾影搖輕浪菱花渡淺流
漏移光漸潔雲斂色偏浮
似璧悲三獻疑珠怯再投
能持千里意來照楚鄉愁

長安早春

開國維東井城池起北辰
咸歌太平日共樂建寅春
雪盡黃山樹冰開黑水津
草迎金埒馬花伴玉樓人
鴻漸看無數鶯歌聽欲頻
何當桂枝擢還及柳條新

巫山

巫嶺峯堯天際重佳期宿昔願相從朝雲暮雨連天暗
神女知來第幾峰

李愷

太原人

和戶部楊員外伯成寓直

落日彌綸地公才畫省郎詞驚起草筆坐引護衣香雙
闕天河近千門夕漏長遙知臺上宿不獨有文強

同望幸新亭賜錢公宴

感夢通玄化覃恩降紫宸
賜錢開漢府分帛醉堯人
地隔朝宗慶亭臨卜洛新
行看廣雲雨二月次東巡

奉和聖製從蓬萊向興慶閣道中留春雨中春
望之作應制

別館春還淑氣催三宮路轉鳳凰臺
雲飛北闕輕陰散雨歇南山積翠來
御柳遙隨天仗發林花不待曉風開
已知聖澤深無限更喜年芳入睿才

陳希烈

宋州人

賦得雲生棟梁間

一片蒼梧意氤氳生棟梁下
簾山足暗開戶日添光偏
使衣裘潤能令枕簟涼無心
伴行雨何必夢荆王

奉和聖製三月三日

上巳迺龍駕中流泛羽觴酒
因朝太子詩作樂賢王錦
纜方舟渡瓊筵太樂張風
搖垂柳色花發異林香野老
歌無事朝臣飲歲芳皇情被
羣物中外洽恩光

省試白雲起封中

千年泰山頂雲起漢王封不作竒峰狀寧分觸石容為
霖雖易得表聖自難逢冉冉排空上依依疊影重素光
非曳練靈貺是從龍豈學無心出東西任所從

崔惠童

尚明皇晉
國公主

宴城東莊

一月人生笑幾回相逢相識且銜杯眼看春色如流水
今日殘花昨日開

崔敏童

惠童
兄也

宴城東莊

一年始有一年春
百歲曾無百歲人
能向花中幾回醉
十千沽酒莫辭貧

石倉歷代詩選卷三十三